

Ādmī, Adan, Aur Aurat

Taurait : Khilqat 2:4-25

Ye āsmaan aur zameen ke banne kī daastaan hai. Us waqt jab Allaah taa'älā ne āsmaan aur zameen ko banaayā thā. ⁽⁴⁾ tab zameen par paudhe aur ghaas ke maidaan naheeñ uge the kyunki tab tak Allaah taa'älā ne zameen par baarish naheeñ karī thī aur nā hī zameen jotne ke liye iñsaan thā. ⁽⁵⁾ Aur phir, kohrā zameen se uṭhā aur usko seeñchne lagā. ⁽⁶⁾ Tab Allaah taa'älā ne zameen se mittī le kar iñsaan^[a] ko banaayā aur uskī naak me zindagī kī saañs phuñkī to us me jaan ā gai. ⁽⁷⁾ Tab Allaah taa'älā ne jannat me ek baaq lagaayā jiskā naam Adan thā. Wo baaq purab me thā aur iñsaan ko usmeñ rahne kī jagah dī. ⁽⁸⁾ Allaah taa'älā ne baaq me kaī tarah ke ped ugaae, kuch k̄hubsurī ke liye aur kuch phaloñ ke ped. Allaah taa'älā ne baaq ke beech me ek ped lagaayā jo zindagī detā thā aur ek ped jo acche aur bure kā ilm detā thā. ⁽⁹⁾ Adan se ek nadī bahtī thī jo baaq ko paanī de kar āge chaar hissoñ me bat̄ jaatī thī. ⁽¹⁰⁾ Pahalī nadī kā naam Fishaan thā aur wo mulk Hawellaah ke chaaron taraf bahtī thī. ⁽¹¹⁾ Us mulk me acche qism kā sonā, ek tarah kā qeemtī itr aur qeemtī kaale patthar bhī maujud the. ⁽¹²⁾ Dusrī nadī kā naam Gihon thā, aur ye Kush ke maidaan me bahtī thī. ⁽¹³⁾ Teesrī nadī kā naam Tigris thā, jo Ashur ke purab me bahtī thī. Chauthī nadī kā naam Furaat thā. ⁽¹⁴⁾

Allaah taa'älā ne iñsaan ko baaq me rakhā taaki wo iskī dekhbhaal kar sake aur zameen jot sake. ⁽¹⁵⁾ Allaah taa'älā ne use hukm diyā, "Tum baaq ke har ped kā phal khā sakte ho" ⁽¹⁶⁾ magar us ped kā phal mat khaanā jisse acche-bure kī tameez ā jaatī hai. Agar tum is ped kā phal khaaoge to sach me mar jaaoge." ⁽¹⁷⁾

Tab Allaah taa'älā ne kahā, "Ye acchā naheeñ ki iñsaan akelā rahe, maiñ uskā jođā banaauñgā jiskī use zarurat hai aur jo uske liye theek bhī ho." ⁽¹⁸⁾ Allaah taa'älā ne zameen kī mittī se saare jaanwaroñ aur chidiyōñ ko banaayā. Allaah taa'älā ne saare jaanwar Ādam^(a.s) ko die aur unhone un sab jaanwaroñ ke naam rakhe. ⁽¹⁹⁾ Ādam^(a.s) ne saare paal tu jaanwaroñ, chidiyōñ, aur saare jañglī jaanwaroñ ke naam rakhe. Ādam^(a.s) ne saare jaanwaroñ aur chidiyōñ ko dekhā lekin apne liye sahī saathī naheeñ chun paae. ⁽²⁰⁾

Tab Allaah taa'älā ne unkō gahrī neeñd me sulaayā aur unke jism se ek paslī nikaal kar us jagah ko gosht se bhar diyā. ⁽²¹⁾ Allaah taa'älā ne ādmī kī paslī se aurat ko banaayā aur usko ādmī ke paas le kar āyā. ^[b] ⁽²²⁾ Ādam^(a.s) ne kahā, "Ākhir ye mere jaisī hai! Iskī hadđī merī hadđī me se hai, aur iskā jism mere jism me se hai. Ye ādmī ke jism se banī huī hai to maiñ ise 'Aurat' pukaaruñgā." ⁽²³⁾ Islie ādmī gharwaalon me se apnī beewī par sabse zyaadā dhyaan detā hai aur wo do jism ek jaan ho jaate haiñ. ⁽²⁴⁾

Ādam^(s) aur unkī beewī ko kapđoñ kī zarurat naheeñ thī kyunki unkō sharm kā patā naheeñ thā. ⁽²⁵⁾

[a] (Quraan Majeed : Annisā 4:1)

[b] Ibraanī zabaan me Ādam kā matlab hai, ādmī, iñsaan, yā log. Iskā matlab mittī bhī hai. (Quraan Majeed : Al-Hijr 15:26)